

Majlis Anugerah Gemilang Siswa UniMAP 2008

Universiti Malaysia Perlis (UniMAP) berazam untuk melahirkan lebih banyak siswazah yang berkualiti dan mampu menjadi aset berharga negara sekali gus bakal mewarnai kanvas kehidupan bangsa dan penggerak tamadun yang bakal dijulang.

Naib Canselornya, Brig. Jen. Dato' Prof. Dr. Kamarudin Hussin berkata, UniMAP kini secara proaktif dan bersepadu telah berusaha membangunkan perkhidmatan, prasarana dan infrastruktur yang menggalakkan kecemerlangan akademik dan personaliti pelajar bagi mencapai cita-cita tersebut. "Usaha ini adalah bertepatan dengan slogan "Satu Malaysia" atau "One Malaysia" seperti yang diwar-warkan oleh YAB Perdana Menteri kita yang baru, Dato Seri Najib Tun Razak baru-baru ini. "Adalah menjadi misi kita kini, untuk melahirkan mahasiswa yang berdaya maju dalam penerokaan ilmu, kecemerlangan sahsiah dan mempunyai semangat perpaduan yang tinggi," katanya.

Beliau berkata demikian ketika berucap pada Majlis Anugerah Gemilang

Siswa UniMAP 2008 di Dewan Kapitol malam tadi. Turut hadir pada majlis itu, Timbalan Naib Canselor Akademik dan Antarabangsa UniMAP, Prof. Dr. Ali Yeon Md. Shakaff dan Timbalan Naib Canselor Penyelidikan dan Inovasi UniMAP, Prof. Dr. Zul Azhar Zahid Jamal. Pada majlis tersebut, mantan Yang DiPertua Majlis Perwakilan Pelajar Universiti Malaysia Perlis (UniMAP) Sesi Akademik 2007/2008, Mohd Alwie Mohd Syaiful Yap, dinobatkan sebagai Tokoh Siswa Gemilang UniMAP 2008. Mohd Alwie menerima piala pusingan, wang tunai RM1,000, jam tangan, plak iringan dan sijil penghargaan. Pemilihan beliau untuk menerima anugerah itu berdasarkan penglibatan yang aktif dalam aktiviti universiti dan pencapaian akademik. Pelajar tahun tiga jurusan Kejuruteraan Rekabentuk Produk itu juga turut menerima Anugerah Khas Juri.

Anugerah Gemilang Siswa UniMAP 2008 ini diadakan bertujuan untuk menghargai sumbangan mahasiswa kepada UniMAP. Dato' Prof. Dr. Kamarudin seterusnya berkata, penglibatan mahasiswa dalam kemajuan ilmu dan pembangunan sahsiah, dapat

mewujudkan masyarakat yang sejahtera dan bertamadun tinggi dengan nilai dan sifat sendiri yang mapan.

"UniMAP sedaya upaya ingin melahirkan pelajar yang mempunyai sifat kepimpinan sejati dan sentiasa berupaya meningkatkan potensi diri dengan penuh rasa tanggungjawab dan amanah demi menyumbang kepada kesejahteraan masyarakat dan negara pada masa akan datang.

"Oleh itu, Anugerah Gemilang Siswa ini diadakan dengan hasrat menjadi pendorong dan motivasi kepada seluruh pelajar kampus untuk menyiapkan diri ke arah penghayatan ilmu yang lebih bermakna di sepanjang pengajian di UniMAP," katanya.

